



Pierina e Jon Carl Tall cun il biadi Gian Andri.

FOTOS C. CADRUVI

# Il trenader che timuna ils Rumantschs da la Bassa

Sin visita tar Jon Carl Tall a Zug

DA CLAUDIA CADRUVI / ANR

■ **Dapi in onn maina Jon Carl Tall l'Uniun dals Rumantschs da la Bassa (URB). Tgi che s'interessescha per sport enconuscha el forsa anc sco trenader dal Club da hockey da Zug u sco trenader da pentatlon.** Il pitschen biadi *Gian Andri* è gist tar il non, cura che l'anr visita *Jon Carl Tall* a Zug. Gian Andri porta in cudesch da Globi al non e di «quinta!». Il non mussa a Gian Andri il «tor» ed il «lasso» cun il qual Globi «piglia» il tor. Il pitschen biadi repeta ils pleds ladins. Tall ha plaschair che ses biadi discorra rumantsch. Sco president da l'URB less el motivar ils geniturs da la Bassa da dar vivanant il rumantsch als uffants.

## Impuls da quatter scripturs ladins

Tall ha deditgà la part principala da sia vita al sport. La cultura saja vegnida in pau a la curta, di el. Tuttina ha el chattà la peda da gidar a fundar l'Uniun dals Ladins da Zug ed ha era dà lecziuns da rumantsch.

Ch'el posseda ina affinitad per il rumantsch ha da far in pau cun sia nona Ursina Clavuot. Ella è stada scriptura ladina ed ha publictà sut il pseudonim Gian Girun. Sco mat è Tall anc vegnì en contact cun trais auters scripturs. L'emprim cun Clà Biert ch'era in bun ami da

ses bab e suenter cun Jon Semadeni, il magister da scola secundar. Semadeni era stà responsabel per ils gieus auditivs rumantschs sin Radio Beromünster. Perquai ha er Jon Carl mintgant obtegnì ina rolla en il radio. Pli tard, durant il seminar da magisters a Cuir, ha Tall fatg enconuschientscha da Tista Murk, tar il qual ils seminarists giovavan teater. «El era in fantastic reschissur ed ina persunalitad carismatica.»

## Magister da sport

Suenter il seminar ha Tall fatg la scolaiziun da magister da sport a Magglingen. Lura è el stà in onn en l'America sco magister da skis, e suenter ha el obtegnì in engaschi dal Palace a San Murezzan per fabricar si la nova purschida da sport da stad. Suenter è Tall stà il magister da sport privat per ina famiglia ritga americana. La famiglia avess il pli gugent prendì cun sai Tall en l'America. Ma il giuven magister aveva absolvì in'ulteriura scolaiziun a Magglingen – quella da trenader. Per pudair lavurar sco trenader è el la finala restà en Svizra.

Da quel temp fascheva Tall pentatlon, in sport che cumpiglia tschintg disciplinas: sajettar, curren, nudar, cursa d'obstachels e trair la granata a precisium e distanza. Tall ha obtegnì l'incumbensa da trenar l'equipa svizra da pentatlon.

Sut ses timun han ils sportists purtà a chasa diversas medaglias e trais titels da campinadis mundials.

## E trenader da hockey

Il 1971 ha Tall maridà *Pierina Castellazzi* ed è sa chasà a Zug, nua ch'era ses dus uffants en naschids e creschids si. El ha instrui sport e durant trenta onns anc trenà il Club da hockey da Zug. «La stad era quai in job cumplain», raquinta Tall. L'entschatta d'avrigl cumenzava il trenament principal e cuzzava fin l'avust cura che la stagiun gieva puspè liber. La damaun trenava el duas fin trais uras cun sia squadra, e la saira anc ina giada. «Tranteren gievjau a dar scola, ed ils giugaders gievan a ruassar. Sch'ins na fiss betg stà motivà, n'avess ins betg tegnì or quai.»

Sper tut quai han Tall e sia dunna fabricà si in center da trenament e da sanadad. Il center marscha oz uschè bain ch'el na lavura betg pli sco magister. Il center porscha trenaments per pazients che han mal il dies u han gi in infarct dal cor. Tall è sa scolà sco magister da Tai-Ji ed ha frequentà numerus auters curs. Da preschent absolva el in studi da «pedagogica imaginativa da moviment».

**Tgi che s'interessescha per l'URB po s'annunziar tar Jon Carl Tall, Hertistrasse 2, 6300 Zug. Telefon 041 710 10 40. E-mail: info@tazue.ch**



**Jon Carl Tall maina dapi in onn l'URB. El posseda in center da trenament e da sanadad a Zug.**

## Curt e bun

*Naschi:* ils 4 d'avrigl 1947

*Creschi si:* a Scuol

*Abita:* a Zug

*Professiun:* magister da sport

*Spaisa preferida:* micluns

*Lieu preferì:* il mar

*Autur preferì:* Dan Millmann, psicolog

## Ils plans cun l'URB

La sonda passada ha Jon Carl Tall manà l'emprima giada la radunanza generala da l'Uniun dals Rumantschs da la Bassa (URB). El ha organisà la radunanza a Turitg parallel cun la Quarta Lingua (guarda LQ dals 7 d'avrigl). Durant ses emprim onn da gestiun ha l'URB realisà la pagina d'internet ch'è dapi onns en discussiun. Uss pon ins s'infurmar sin [www.uniun-urb.ch](http://www.uniun-urb.ch) davart occurrenz rumantschas en la Bassa – saja quai concerts, teaters u prelecziuns. Plinavant ha l'uniun in nov leporello. Quest onn actualisescha la suprastanza en collavuraziun cun la Lia Rumantscha las adressas dals commembers. Tall è era fitg cuntent che ses consuprastants en activs e che mintgin lavura bain en ses «departament».

Il president less activar ils Rumantschs da la Bassa e procurar che

tuts interessads sajan cumpigliads en l'uniun. Plinavant duessan ils Rumantschs en la Bassa vegnir infurmads meglier davart quai che curra e passa en lur vischinanza.

## Ils termins per il 2008

Per quest onn ha l'URB gia plirs termins en sia agenda.

– Ils 24 da matg ha lieu a Turitg en il Zentrum Karl der Grosse il teater «Art» dal Palc Ladin. La preschentaziun cumenza a las 20.00.

– Ils 13 da settember datti in chant avert a Zug cun il dirigent *Aaron Tschaller*.

– Ils 17 d'october vegn il cabarettist *Flurin Caviezel* a Cham.

– Ils 16 da november organisescha RTR ina sairada rumantscha a Cham.

– Il 2009 è planisà ina visita en chasa federala a Berna.